

Ti xroon saxoxín chr'éhen Pablo

Timoteo

Pablo nixjehe Timoteo

1 ¹ Ìnchéni Jesucristo mé kjueyá ti janhan, Pablo, kixin tsoxrjanka ti itan kuènté ch'an, éxi tsík'etqan Díos, ti nkexro sinchekaá kaín chojni, la ko Jesucristo, ti nkexro tjejóchóheni tsokjan, ^{2*} ikjian ti xroon i ts'ayéhé jaha Timoteo. Jaha t'íkuañ éxi xjana kixin tinkachónkia Ìnchéni Jesucristo. It'éni Díos la ko Ìnchéni Jesucristo sintañaoan la ko tsikonoáha kixin tjuahá ch'an.

Chrokuitekakhñña sin ti itan nduáhya

³ Ti ó sákjuia Macedonia la xrjanoáhá kixin tsítóha Éfeso, la tsétuehén ti iso sin tjejó ntiha kixin tsjakohya sin ti nkehe nduáhya ⁴ la ko chrókuitekakhñña sin ti cuento chronka chojni kixin tíha la imá nchekjajon chojni la ó chónkó kaín tíha, la tsjinkítsahya kixin sinchexiteyéhe sin Díos, kixin jehe sin la ó titekaon sin Ìnchéni.

⁵ Tétuəhan tíhi kixin antsí chrókjuakoxin sin chrótjuehé kícho sin kixin ó kótjóá asén sin la ko jína tsjenkayáxin sin la ko kaín asén sin chrókuitekaon sin Ìnchéni. ⁶ Kixin nkojín sin la k'uitjáñehen sin tíha la sákjuichroe sin la itjo sin ti nkehe sínkíhya. ⁷ Jehe sin tjinkaon sin chrók'óna sin maestro chrókjuako sin ley, kjánchó ni tienxínhña sin ti nkehe tjako sin, kjánchó tjako sin éxi nohe sin kaín nkehe.

⁸ Kaíni noheni kixin jína ti ley ti jína tsjakoni éxi tjinkaon Díos. ⁹ Kjaxin noheni kixin kohya nijnko ley tsjasótexín ti chojni jína. Ti ley la k'óna kixin tsjasótexín ti sin titekakhñña, ti sin jiehe, ti sin tjasin ijie, ti sin chóntehya kjuasáye Díos, ti sin t'óñá it'é la ko ñné la ko ti sin tjàya, ¹⁰ ti sin chóna ijnko chojnichjin jehya ichjién, ti sin nkokón ndoa chóna kícho, ti sin teé ijnko chojni ndá tjanchia chichaon, ti sin ch'ia, la ko ti sin nchenohe Díos ndá chaxínhña

nchexiteyá. Ti ley mé tsjasótexín kaín ti chojni ich'e ti nkehe jínahña la ko nínkakohen ti nkehe jína kuènté Ìnchéni. ¹¹Díos chóna kaín kjuachaxin mé k'uetōan kixin tsōxrjanka tíhi, ti itan jína tsaáxin kaín chojni.

Ti ixra kjuíuch'e Pablo

¹²Tjaha kjuasáya Ìnchéni Jesucristo kixin imá kjuínkítsa ch'an la ko k'uíkon ch'an kixin jína it'a ixra ndá kjuajon ch'an ti ixra i. ¹³*Kjónté senó la imá k'uándaxíhan ti sin tinkáchónki Ìnchéni la ko k'uéchráha sin kixin chrók'oñá sin, la Díos kuíkonoéhe ti janhan kixin ó nohe ch'an kixin k'uékitekakuanhña Cristo la ko nonahña ti nkehe k'uékjít'a. ¹⁴Kjánchó Ìnchéni la imá jína ch'an la antsí kjuíncheñao ch'an ti janhan la kjuajon ch'an kjuachaxin tsinkachónkia ch'an la ko tsotjuaha ti sin kíchóni kixin tinkachónkia Ìnchéni Jesucristo.

¹⁵Ti itan i, mé ijnko nkehe chaxín jína la kaíni chrókuitekaoni: Jesucristo ikui chjasintajni kixin sinchekaá kaín ti chojni chóna ije, la janhan mé ijnko ti chojni antsí chóna ije. ¹⁶La kjónté xíkaha, la Díos antsí kuíkonoéhe ti janhan kixin xíkaha kjuakoxin Ìnchéni Jesucristo kixin imá jína ch'an la ko tikonoéhe ch'an

chojni. La xíkaha tsjákoxian ts'ikon kaín ti chojni tsitekaon kixin tsochóna sin ti kjuachón nkochrín. ¹⁷Méxra nkochrín chrókjuikosáyeheni la ko chróchjeheni kjuasáye ti Rey t'etōan nkochrín, ti nkexro xráxin itjen, ti nkexro chónhña its'en la ko xitjahya ts'ikoni. Jehó ch'an mé Díos ch'an la imá nohe ch'an. Mé xíkaha tsohen.

¹⁸Jaha xjana Timoteo, kaín ti ixra i tjahá sinchexiteyá éxi ti nkehe chrónkaxín sin ihnié Díos ósé sich'e jaha. Tíhi la tsjinkítsa kixin jína tsjájonkoa ti jínahña. ¹⁹Titekaoan Ìnchéni la ko tjénkayáxian ti nkehe jína, kixin nkojín sin la kjuénkayáxinhña sin jína ndá sákjuichroe sin, la í titekaonhña sin Ìnchéni. ²⁰Mé xíkaha kóhen ch'in Himeneo la ko Alejandro. Janhan kjuánjua kjuachaxin kixin ti Jínahña sinchekjasóte ti jehe sin kixin ts'itja sin í ts'ándaxíenhña sin Díos.

Nkexrín tsonixjeheni Díos

2 ¹Tjáncháhára kixin chrónixjehéra Díos la ko chróchronoéhéra ch'an la ko chrókjuanchehéra ch'an la ko chróchjehéra ch'an kjuasáya. ²Chrokjuanchehéra Díos kixin tsjinkítsa ch'an kaín ti gobierno la ko kaín ti sin t'etōan nkojnko chjasin kixin xíkaha kjuaxróxin chrók'uejóni la ko

sinchexiteyéheni Díos la jína chrókjuénkayáxini. ³Tíhi mé ijnko nkehe jína la tóxríhín Díos, ti nkexro tsaáxini. ⁴Díos mé tjinkaon kixin tsaá kaín chojni la ko tsonohe sin ti nkehe chaxín ndoá. ⁵Kixin nkokoa Díos itjen la ko nkokoa nkexro tsonixjayákohe ti jeheni kixin jína tsochóxini Díos. Tíha mé Jesucristo k'óna chojni chjasintajni. ⁶Jehe ch'an mé kjuajon ch'an asén ch'an, ik'uén ch'an la xíkaha kjuenkā ch'an ti ijiéni kixin kaíni tsochóntani ti kjuachón nkochríxín. Tíha mé xiteyá ti ñao kjuénkayáxin Díos tsohen. ⁷*Méxra janhan k'uayáha ti ixra i kixin tsotjanka ti sin jehya judío kixin tsínkáchónki sin Inchéni Jesucristo la ko tsonohe sin ti nkehe chaxín. Janhan t'aha Díos ixra, la xrjanká ti nkehe chaxín jehya kjuach'ia.

⁸Méxra tjínkaon kixin kaín ti sin ndoa mé chrónixjehe sin Díos la chrókjuaya sin itja sin kaín asén sin, la ko chróchóntahya sin ninkehó kjuanínkaon la ko chrók'uándaxiéhñā kicho sin. ⁹*Andá ti chojnichjin la yóxin chrók'uítsa sin, jehya ika imá najni, la ko chrókjuinchenkehya sin, la ti kaxihí sin la chrókjuasichóntahya sin nkehe imá tjete, chróchóntahya sin oro o ixro perla o nkehe

imá tjete. ¹⁰Ícha jína antsi chrókóxakohen sin chrókjuích'e sin ti ixra jína éxi kjuích'e kaín ti chojnichjin kjuínchetjóa Díos. ¹¹Ti chojnichjin la chrótáníkoá sin chrókuihin sin ti nkehe xrákohe sin la ko nkójina chrókjuinchexiteyá sin. ¹²Janhan tjájonhña kjuachaxin kixin ti chojnichjin chrókjuako ti síin chojnindoa la ko tjájonhña kjuachaxin kixin chrók'uetuehen sin ti chojnindoa. Jehe sin la chrótáni sin, chrókuihin sin ¹³*kixin sao kjuích'éna Díos ch'in Adán ndá chr'éxin ti tjan Eva. ¹⁴*La jehya Adán kuitekaon ti nkehe ndáchro ti Jínahña. Ti tjachjin mé kuitekaon tíha, ndá xíkaha xrankíxin k'uíxin ijie. ¹⁵Andá ti chojnichjin la tsaá sin ti tsochónta sin xjan, la sinchekaá Díos ti jehe sin, ti chaxín tsitekaon sin Díos, la tsotjuehe sin chojni, la ndoá ts'ejó sin la ko jína tsjenkayáxin sin.

Jína chrók'uejó ti sin t'etuehen ti nínko

3 ¹Tíhi mé ijnko nkehe chaxín tsondárjan. Ti nkexro tjinkaon sich'e ixra kuénté nínko mé ijnko ixra jína tjinkaon sin. ²*Méxra ti nkexro t'etean la ndoá chrók'uejó sin kixin kohya nkexro chrók'ueka ijie ti jehe sin, chróchónta sin nkokoa ichjién

sin, jína chrók'uejó sin, la jína chrókjuénkayáxin sin, chróchónta sin kjuasáye sin, la kjaxin jína chrónixjehe sin ti nkeexo tjiji ndøe sin la ko chrókónohe sin tsjako sin. ³Chrokókoanhña sin, chrókjueyáhya sin kjuanínkaon la ko tsjenkayáxinhña sin sich'ia sin kixin tsjacha sin itsjé chichaon. Ícha jína chrókjuakoxin sin jína, la kjuaxróxin chrók'uejó sin la ko chrókózakuenhña sin chróchónta sin itsjé chichaon. ⁴Kjaxin chrókónohe sin chrók'ueñoan sin ndøe sin, la chrókjuenduéhe sin ti xjeen sin kixin chrókuitekaon xjan la ko chróchóntehe xjan kjuasáye xjan kaín chojni. ⁵Andá ti nkeexo tjachahya t'ñoan ti ndøe la, ¿nkexrín chrókjuacha chrók'ueñoan ti nínko kuènté Díos? ⁶La ko kjaxin ti nkeexo tsjako la jehya ijnko nkeexo nixin kuènté nínko. La náhí, kixin ti xikaha la imá sinchenke sin ndá tsjasin sin ijie éxi ti jínahña kjuasin ijie ósé. ⁷La ko ticháxin chróchónta sin kjuasáye sin kixin ti sin naxa tinkáchónkihya Ìnchéni la tsochóntehe kjuasàya ti jehe sin. Andá ti náhí, la tsjonta chojni ti jehe sin, la tsjacha ti Jínahña tsjachróde ti jehe sin, ndá tsjasin sin ijie.

**Nkexrín chrók'uejó
ti sin diácono**

⁸Kjaxin ti sin diácono, tjinkítsa ti ixra kuènté nínko, la ticháxin chróchónta sin kjuasáye sin, la ti nkehe tsondáchro sin la ticháxin

tsoxiteyá, kjaxin chrókókoanhña sin la ko chrókjuich'iahya sin kixin chrókjuacha sin itsjé chichaon. ⁹Mé xikaha ticháxin chrók'uitjánehña sin ti nkehe jína kufhin sin, ti nkehe titekaoni kaíni, la ko chrókjuich'ehya sin nkehe sincheníhi asén sin. ¹⁰Andá ti chrók'uaýéhe sin ti ixra diácono la sao chrókjuakoxin sin kixin jína ich'e sin ti ixra, ndá jína ts'óna sin diácono kuènté nínko. ¹¹La ko kjaxin ti ichjién ti sin diácono la ticháxin chróchónta sin kjuasáye sin, la chrókuinkáchónkihya sin kjuach'ia, la jína chrók'uejó sin la ko chrókjuinchesteyá sin kaín ti nkehe jína. ¹²La ti sin diácono la ójnko ichjién sin chróchónta sin, la chrókjuacha sin chrók'uetuehen sin ti xjeen sin la ko ti ndøe sin. ¹³Kixin ti sin sich'e ijnko ixra jína la antsí ts'áyéhe sin kjuasàya la ko kjuaxróxin ts'ejó sin kixin tinkáchónki sin Ìnchéni Jesucristo.

**Díos mé kjuínchenoheni
ti nkehe k'uénoehñani**

¹⁴Tjínkaon chrókjuasántsjahára tjoka, kjánchó sao tjínkaon tsokjian ti xroon i ¹⁵kixin ti naxa sintaxrjen ntihi, la kjónté tsonohara nkexrín chrók'uejó ti sin kuènté Díos, kixin jehe sin mé ti nínko tjechón kuènté Díos. La t'ayakonheni ti itan chaxín kuènté Díos. ¹⁶Ninkexró

chróndáchrohya kixin chaxínhña ti nkehe tinkáchónkini, kixin tíhi mé ijnko nkehe tjetoan la ninkexró k'uénoehña:

Kixin Jesucristo mé ikui k'óna chojni;
la Nchakuén Díos kjuakoxin kixin jína ch'an.
La ti sin ángel mé k'uíkon sin ch'an
la kuenté chjasintajni kuíhin sin ti nkehe chrónka ch'an,
la itsjé chojni kuitekaon sin.
Ndá sákjuí ch'an nkaya nkajní la k'uáyéhe ch'an kjuachaxin.

Ti sin nduáhya tsjako

4 ¹Ndáchro Nchakuén Díos kixin ti ó chjina tsjeje chjasintajni la iso sin mé tsítóhe sin, í tsinkáchónkihya sin Ìnchéni, ndá tsitekaon sin ti nchakuén jínahña sich'iyehé ti jehe sin la tsitekaon sin ti nkehe tsjako. ²La tsitekakohen sin ti sin xrich'iyehé chojni la tjenkayáxinhña sin ti nkehe nduáhya ich'e, la í tósuèhya kixin ó tsíkócha ti kjuaxrexinkaon kuèté sin. ³Ti sin a mé tsjako kixin jehya jína tsotéhe chojni la ko jehya jína sinie chojni nkojín nkehe. Kjánchó Díos kjuích'éna kaín ti nkehe sinieni la jeheni chojni ó tinkáchónkini Díos la noheni ti itan chaxín ndoá, la jína sinieni kaín nkehe ti sao tsochjéheni Díos kjuasáya ndá sinieni. ⁴Kaín ti nkehe kjuích'éna Díos la jína,

méxra chróndáchrohyaní kixin jehya jína. Ti senó tsochjéheni Díos kjuasáya ndá sinieni ⁵Méxra jína sinieni kaín nkehe kixin Díos xíkaha ndáchro la ko kixin jeheni la ó kjuancheheni Díos sincheñaó.

Ijnko chojni jína ch'ehe ixra Jesucristo

⁶Ti kaín tíhi tsjákohé ti sin kíchóni la jína tjech'e ixra kuèté Ìnchéni Jesucristo la ts'ánkí ti kjuaxrexinkaon kuèté kixin tinkáchónkia ti itan kuèté ch'an la ko tjákua ti nkehe jína kuihín. ⁷Méxra chrókuitekakonhña ti cuento kuèté chjasintajni la ko ti nkehe nduáhya tinkáchónki chojni kixin ó chónkó tíha. Andá antsí titekaon Díos. ⁸Kixin ti chojni tóxríhín chrókuinká la jína tíha, kjánchó antsí tjetoan ti chrókóxakoheni chrókjueyáni Díos. Tíha la tsjinkítsa kixin jína ts'ejóni ijie la ko chr'éxin kixin ts'áyéheni ti kjuachón nkochríxín. ⁹Tíhi mé nkehe chaxín jína la kaíni chrókuitekaoni. ¹⁰Méxra, kjónté t'ándaxín chojni, la tjejóch'eni ti ixra i, kixin tjejóchóheni itsi ti Díos tjechón. Kixin jehe ch'an chaxín sinchekaá ch'an kaín ti chojni titekaon ti jehe ch'an.

¹¹Kaín tíhi mé ticháxin tsochronka la ko tsjákuá. ¹²La chrókuahya kuèté kjónté tsjanoá chojni ti jaha kixin naxa ndasoyá. Ícha jína chrókjuákoéxian ti sin tinkáchónki Ìnchéni nkexrín

chrónixja sin, nkexrín ndoá chrók'uejó sin la ko nkexrín chrótjuehé sin Díos la ko nkexrín chrókuitekaon sin Ìnchéni kixin tjóá chrók'uejó sin. ¹³Ti naxa tsjasánhya janhan, la nchekuáxian ti xroon itén Díos kixin tsihin kaín ti sin kíchóni la nchexraxinkaoan sin ti nkehe jína la ko tjákohé sin. ¹⁴La chrókuítóéhya chrókjuich'e ti ixra kjuajon Díos ti ó k'uejótja itja ti sin t'etóan kuenté nínko ti ikjá éxi tsik'etuehen nchakuén Díos.

¹⁵Méxra chrókóxakohan chrókjuinchexiteyá kaín tíha kixin kaín chojni chrók'uikon kixin jína noha. ¹⁶Chrokóxakohan chrókjuákokoxian jína la ko chaxín jína chrókjuàkua ti itan, la chrókjuinchexiteyá kaín ti nkehe jína, ndá xikaha la tsaá jaha la ko kaín ti sin tjejótihin tjákua.

Nkexrín chrók'uejó ti sin tinkáchónki Cristo

5 ¹Jaha la chrókóninkakuenhña ti sin táda. Náhí, chróchenka sin nkojína éxi chrónixjehé it'á xikaha. La ko kjaxin ti sin ndasoá la chrónixjehé sin nkojína éxi kichua xikaha. ²La ko ti sin nána la chrónixjehé sin éxi iná xikaha. La ti sin tjarisoá la nkojína chrónixjehé sin éxi chrónixjehé ijnko kichua xikaha la ko chaxín chróchónthehe sin kjuasàya.

³Tjinkitsa ti sin ik'án ti chaxín chónthaha sin nkexro tsjinkitsa ti jehe sin. ⁴Andá

ti chojnichjin ik'án, ti chóntha sin xjeen sin o ínté sin, la ti sin a chrók'uayakohen sin ti ìñé sin o náchrji sin, Kixin tíha chrókjuenkaxin sin ti ixra kjuich'e ti it'é sin la ko ìñé sin ti k'uánkí sin, kixin xikaha tóxríhìn Díos. ⁵Ti chojnichjin ik'án, jehó kuítóhe la antsí tóxakohen sin tinkáchónki sin Díos la titoéhya sin nixjehe sin ch'an nchakotjin la ko tie. ⁶Andá ti chojnichjin ik'án, ti tjinkaon sin sich'e sin ti nkehe nduáhya, la kjónté tjejótsjehe sin, la éxi tsík'en sin xikaha. ⁷Tétuehén sin kixin sinchexiteyá sin kaín tíhi kixin tsokohya nkexro ts'ándaxíhìn ti jehe sin. ⁸Ti nkexro t'ayakuenhña ti sin kjéhya la ko ti sin tjejó ndoe, la xikaha tjákoxin sin kixin chaxínhña tinkáchónki sin Díos, la antsí chóntha sin ijie, ke ti chojni titekakonhña Díos.

⁹Ti ó ts'ínixín ihnié ti sin ik'án, la jehó ti sin chóntha sesenta nánó la ko ti sin k'uéchóntha nkokoa xii ó mé jína ts'ínixín. ¹⁰Tsjehe á jína ti ixra ich'e sin, á jína kjuínchek'ánkí sin xjeen sin, la á jína nixjehe sin ti nkexro tjiji ndoe sin, á jína tjinkitsa sin tjajon sin nkehe sinie ti sin tinkáchónki Cristo la ko á tjinkitsa sin ti sin níhi la ko íso ixra jína tjákoxin sin.

¹¹Kjánchó chrók'uínixínhña ihnié ti sin ik'án naxa tsjéhya nánó chóntha kixin ti naxa tsotjinkaon sin tsotehe sin, la ts'itjáñehen sin Ìnchéni. ¹²Ndá

xikaha tsjasin sin ijie kixin sinchexiteyáhya sin ti nkehe tsíndáchro sin. ¹³Ndá tsoséhe sin, la sáti sin ijnko la íjnko nchia la tsoxríhín sin sich'éna sin kjuach'ia la ko ts'ajiko sin ti kjuach'ia la xikaha tsonixja sin ti nkehe chrónixjahya sin. ¹⁴Méxra ti sin ik'án naxa tjarisoá la ícha jína chrókótehe sin, la chróchóna sin xjeen sin la chrók'uyakohen sin ndoe sin. La chrókjuajonhña sin kjuachaxin kixin ti Jínahña chrók'uetuehen ti asén sin, andá xikaha chrókjónahya chojni ti jehe sin. ¹⁵Kixin iso ti sin ik'án la kúitohe sin í tinkáchónki sin Ìnchéni ndá nchexiteyéhe sin ti Jínahña.

¹⁶Andá ti nkojín ti chojni tinkáchónki Ìnchéni naxa kjéhya ijnko ti sin ik'án, la ticháxin tsjinkítsa sin kixin tsochóntiahya sin kixin ti nínko tsjinkítsa. Ndá xikaha tsjacha ti nínko tsjinkítsa ti sin chaxín ik'án chóntahya nkexro tsjinkítsa.

¹⁷Ti nkexro jína t'etoan ti nínko la ticháxin antsí chrókjuikosáyehe chojni ti jehe sin ti chaxín ti ixra ó tjejóch'e sin, chrónkaxín sin la ko tjako sin. ¹⁸*Kixin ti xroon itén Díos ndáchro: “Chrok'uíkkehya ir'ua ti koxinta ich'e ixra kixin chóna va kjuachaxin sinie va”, la ko kjaxin ndáchro: “Ti sin ich'e ixra mé chóna kjuachaxin tsjacha sin kjaxin.”

¹⁹*Chrokuitekakonhña ti nkojín chojni t'eka ijie ti nkexro t'etoan ti nínko. Ticháxin tsjijiko sin yaá o iy'á chojni tsochronka á chaxín chóna ijie ti nkexro o náhi. ²⁰Andá ti nkexro tjasin ijie, la tjenduéhe sin ts'ikon kaín ti sin nínko kixin í tsonixjahya ch'an; mé xikaha tsochakon ti iso sin la tsankíhya sin. ²¹Méxra tétuanxían ti kjuachaxén Díos la ko Ìnchéni Jesucristo la ko ti sin ángel kuénté ch'an kixin nkókon chrók'uetuehén sin, á ti sin antsí nohe o nkojín ti sin antsí choxián. ²²La kjaxin tsjehé jína ti ó tjéyá nkojín sin chrók'uetoan ti nínko, kixin ti chróchóna sin ijie la kjaxin jaha chrókuamá tíha. Méxra jaha kjaxin chrókuítóhé kaín ti nkehe nduáhya.

²³Andá jaha nkoyaxón tóníha tjoté tsaá la jehya inta ó chrók'ia. Náhi. Kjaxin intsí xranvino chrók'ia.

²⁴Ti ijie tjasin nkojín chojni la noxín t'ikoni ndesi naxa titoxínhña ti ijie. Andá iso chojni noxínhña tjasin ijie, kjánchó ti ó ñao tsjixixín la tsonoxín kaín tíha. ²⁵Mé xikaha ti chojni ich'e ti ixra jína la noxín ts'ikoni. Andá kjónté iso ti ixra jína tónoxínhña ijie, la chr'éxin la tsonoxín.

6 ¹Andá ti nkexro ch'exín ixra la ticháxin tsochóntehe sin kjuasàya ti làmoé sin, ndá xikaha ti lamo la chrók'uaándaxiéhñña Díos

la ko ti itan chrónkani. ²Andá ti nkexro chóna làmoé tinkáchónki Cristo, la chrókuítqehya sin tsjikosáyehe sin kixin nkoqoa kícho sin. La antsí chrókóxakohen sin chrókjuích'e sin ti ixra jína kixin ó nohe sin kixin ti nkexro a la ijnko nkexro tinkáchónki Ìnchéni la ijnko nkexro tjuéhe sin. Jaha, tjákohé sin kaín tíhi.

Ti nkehe tinkáchónkini tsqchèxini

³Andá ti nkojín chojni tjako ti nkehe nduáhya tóyoéhya ti nkehe jína kjuako Ìnchéni Jesucristo la ko jehya éxi ti tan tinkáchónkini, ⁴la jehó xrinchehnke sin la noehña sin ninkehó. Imá itjo sin nkehe chónkó, la tíha mé tjixín ti kjuachjinoxíhin, ti tjajonko kícho sin, ti t'ándaxíhin kícho sin la ko ti chóntehya sin kjuasàya kícho sin. ⁵La náxrjónhña tjenkayáxin sin la nkochríxín tjajonko kícho sin la noehña sin ti nkehe chaxín. Tjenkayáxin sin kixin ti chrókuinkáchónki sin Ìnchéni, la xíkaha chrókjuacha sin nchónhña chichaon. ⁶Chaxín ti tinkáchónkini Ìnchéni la tsjachani ijnko nkehe imá tjete, kjánchó kjuaxróxin chrók'uejóni kjónté ti nkehe chóntani ó. ⁷Kixin ti k'okjíhini la ninkehó kjuikohyani chjasintajni, la ko ti ó its'eni la ninkehó nkehe xrokuaaha sátsjikoni. ⁸Méxra

ti chóntani nkehe sinieni la ko ikéni, la chrókóchéheni. ⁹Kixin ti sin tjinkaon tsochóna itsjé nkehe tjete la tsjachahya sin ts'atsínka sin ti kjuaxróxinhña itsi la xíkaha sátjichroe sin la ts'itsínka sin kixin itsjé nkehe jehya jína tjinkaon sin, la tíhi ts'itjáñaxín sin. ¹⁰Kixin ti imá tsotjinkaoni ti chichaon la tíha tsjixín kaín ti nkehe jínahña, la nkojín sin la imá tjenkayáxin sin tsochóna sin itsjé chichaon ndá xíkaha sákjuichroe sin, í tinkáchónkihya sin Ìnchéni la tíha mé kjuasótexín sin.

Tjajonkoni ti nkehe jínahña kixin titekaoni Ìnchéni

¹¹Kjánchó jaha, ijnko chojni kuénté Díos, titqhé kaín ti nkehe nduáhya síin. Ndoá tjak'e, kaín asán xráinkaoan Díos, la tinkáchónkia ch'an, tjuéhé ti kichua, la tónínkákónhña la ko nchejiéhya asán. ¹²Tjajonqoa kaín ti nkehe jehya jína la ko kaín asán tinkáchónkia Ìnchéni kixin tsjacha ts'ayéhé ti kjuachón nkochríxín kixin xíkaha k'uéyaha Díos la ó tsíchronka ch'an kixin tsinkáchónkia Ìnchéni la ó kuíhin ko k'uíkon itsjé chojni. ¹³*Kjuachaxíen ihnié Díos, ti nkexro chjéhe kjuachón kaín ti nkehe síchón, la ko Jesucristo, ti nkexro tsíchronka ti nkehe jína nkayakon ch'in Poncio

Pilato, mé tétōanxián ¹⁴kixin s̄inhexiteyá kaín ti nkehe kuétōan kixin í chrókjuinkíhya ti nkehe tinkachónkia kixin tsokohya ninkexró ts'eka ijje, hasta tsjixrakájña ti ñao tsokjan Ìnchéni Jesucristo. ¹⁵Andá ti ó tsjixraká ti ñao kjueyá Díos, ndá jehe ch'an sinchexiteyá ch'an kaín tíhi. Jehó ch'an mé chóna ch'an kjuachaxin ts'etōan ch'an la ko jehó ch'an mé ti Rey t'etuehen kaín ti sin rey la ko Ìnché kaín chojni. ¹⁶Jehó ch'an mé Díos xrokjuahya its'en la ko itjen ch'an ti t'inkaséña la xitjahya tsoghjina ninkexró. La ninkexró k'uíkonhña ti jehe ch'an la ko ninkexró xitjahya ts'ikon ti jehe ch'an. Tsjikosáyeheni Díos kixin chóna kaín kjuachaxin ts'etōan nkochríxín. Mé xikaha tsōhen. ¹⁷Andá ti sin chóna itsjé nkehe tjete, la ndáche sin kixin sinchenkehya sin, la ko tétuehén sin kixin tsjenkayáxinhña sin kixin ti nkehe tjete chóna sin tsaáxin sin kixin nkochríxínhña

tsochóna sin tíha. Ícha jína chrókuinkáchónki sin Díos tjechón kixin jehe ch'an tsjajon ch'an kaín nkehe kixin tjinkaon ch'an kjuaxróxin ts'ejóni. ¹⁸La ndáche sin kixin tsjenkayáxin sin ti nkehe jína, la ko sich'e sin ixra jína, la tsjinkítsa sin ti nkexro chónahya la ko chrók'óxikeyehe sin ti nkehe chóna sin. ¹⁹Ndá xikaha chrókjuacha sin ti nkehe tjete kixin chr'éxin la jína chrók'uejó sin la chrókjuacha sin chróchóna sin ti kjuachón nkochríxín.

**Ti nkehe kjuixixín
k'uítuehen Timoteo**

²⁰Jaha Timoteo, t'ayakohén ti ixra kjuajon Díos la ko tienhña ti nkehe nduáhya la ko chónkó nixja chojni. Ndáchro sin kixin imá nohe sin, kjánchó chaxínhña nohe sin. ²¹Kixin nkojín ti sin xikaha tjenkayáxin ndáchro kixin imá nohe la sákjuichroe sin, í tinkáchónkihya sin Ìnchéni. Díos mé chrókjuintañaan. Mé xikaha tsōhen.